



2023-1

9. marts 2023

All. nr./notatnr.:

2021-120-0002-37

Sull./sagsbeh.: LK/jh

Piffissaq kommunip suliamik suliarinninnerminut atugaa suliamillu suliarinninnera akuerineqarsinnaangitsut

Innuttaasoq Qeqqata Kommuniani (matuma kingornatigut kommunimik taaneqartartussami) siusinnaartumik pensionisiaqalerumalluni 19. april 2016-imi qinnuteqaateqarpoq.

Allakkat kommunip 18. november 2020-mi innuttaasumut nassiuppai, taakunanngalu erserluni suliaq suliarineqarsimanngitsoq, tassami pineqartoq ukioqqortunini pissutigalugu utoqqalinersiaqalersinnaatitaalernissami tungaanut ulluni 22-innarni siusinaartumik pensionisiaqarsinnaatitaasussaammat.

Kommunip siusinaartumik pensionisiaqalerumalluni qinnuteqaammik suliarinninnera innuttaasup Ombudsmandimut 5. januar 2021-mi naammagittaalliuutigaa.

Ombudsmandip suliamik misissiuneq naammagittaalliuut tunngavigalugu aalartippaa.

Kommunip suliaq innuttaasup 5. januar 2021-mi Ombudsmandimut naammagittaalliornerata kingornatigut suliareqqilerpaa, innuttaasorlu 1. oktober 2021-mi aalajangiinermigut 1. september 2020-mit atuutilersumik siusinaartumik pensionisiaqalersillugu.

Innuttaasup siusinaartumik pensionisiaqalerumalluni qinnuteqaataanik kommunip suliarinninnera Ombudsmandip pisariaqanngitsumik sivisuallaarsimasutut isigaa.

Innuttaasup siusinaartumik pensionisiaqalerumalluni qinnuteqaataanik kommunip inaarsaalluni suliarinnissimannginnera, inaarsaallunillu suliarinninnissaraluamut taarsiullugu allakkanik suliap siusinaartumik pensionisiaqalerumalluni qinnuteqaammut tunngasup innuttaasup ulluni 22-innarni siusinaartumik pensionisiaqareerluni utoqqalinersiaqarnermut ikaarsaartussaanaera pissutigalugu suliarineqannginnissaanik nalunaaruteqarfiusunik innuttaasumut nassiusisimanera Ombudsmandip isorisarialittut isigaa.

Tassani kommunip aqutsisoqarfiata piginnaatitaanini pisinnaatitaaninilu avaaqullugit iliuuseqarsimanera Ombudsmandip ajuusaarnartutut aamma isigaa, innuttaasummi siusinaartumik pensionsiaqalerumalluni qinnuteqaataa Atugarissaarnermut Ataatsimiititaliamut saqqummiunneqanngitsoormat.

Ombudsmandip ataatsimut isiginnilluni paasinninnera unaavoq suliami matumani piffissaq suliarinninnermut atorneqartoq suliamillu suliarinninneq akuerineqarsinnaanngitsut pineqartut.

Suliap piffissani pingasuni tulleriinneri malillugit qaammatini 27-ni, qaammatini qulini aamma qaammatini arfineq marlunni iliuuseqarfigineqarani uninngatinneqartarsimanera kiisalu suliap ataatsimut isigalugu ukiut tallimat sinnerlugit suliarineqarsimanera Ombudsmandip pingaartillugu isiginiarpaa.

Kommunip suliarinninnerani siusinaartumik pensionisiat pillugit aalajangiinissaq eqqarsaatigalugu kommunip pisinnatitaaneq pillugu nammineq ilumini aalajangersakkanik malinnissimannginnera Ombudsmandip aammattaaq pingaartillugu isiginiarpaa.

Kommunip oqaatigaa sulianik siusinaartumik pensionisianut tunngasunik suliarinnittarnermi periaaseq annertuutigut allannguuteqartitsiviusimasoq.

Ombudsmandip kommuni qinnuigaa sulianik siusinaartumik pensionisianut tunngasunik suliarinnittarnermi periaaseq annertuutigut sutigut allannguuteqartitsiviusimanersoq paasissutissiissutigeqqullugu.

Ombudsmandip kommuni aammattaaq qinnuigaa kommuni eqqaasitsiseriaatsimik pitsaasumik suliat siunissami puigorneqartannginnissaannik qulakkeerisumik peqarnersoq paasissutissiissutigeqqullugu

Ombudsmandip kommuni naggasiutitut qinnuigaa oqaaseqaat, matumani taarsiissuteqartoqarsinnaanera ilanngullugu eqqarsaatigalugu, qanoq iliuuseqarnissamut pissutissaqalersitsinersoq nalunaarutigeqqullugu.

Ombudsmandip Inatsisartut Inatsisinut Ataatsimiititaliaat aamma Qeqqata Kommuniani kommunalbestyrelsi Ombudsmandi pillugu inatsimmi § 23, tunngavigalugu nalunaarfigaa, § 23-kkullu aalajangersarneqarpoq pisortat ingerlatsivianni annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq Ombudsmandip suliamik misissuinerata takutippagu Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqassasoq.

(Oqaaseqaat 9. marts 2023, j.nr. 2021-120-0002-24)

Tamatuma kingornatigut imatut oqaaseqaateqarpunga:

1. Suut misissorpakka?

1.1 Suliamik suliarinninninni A-p 19. april 2016-imi siusinaartumik pensionisiaqalerumalluni qinnuteqaateqarneranit A-p 1. september 2020-mit atuutilersumik Qeqqata Kommunianit 1. oktober 2021-mi siusinaartumik pensionisiaqalersinnetarnerata tungaanut piffissaq Qeqqata Kommuniata suliamik suliarinninnerminut atugaa suliamillu suliarinninnera isummerfiginiarlugit aalajangerpunga.

Danmarkimi inatsisilerineq pillugu atuakkiaasimasut Folketingillu Ombudsmandiata periaasia oqaaseqaatinni arlalitsigut aallaavigisarpakka, immikkoortunimi taakkunani Kalaallit Nunaanni inatsiseqartitsinikkut tunngaviusup Danmarkimi inatsiseqartitsinikkut tunngaviusoq innersuussutinit taaneqartunit ersertutut pingaarnerusutigut assigimmagu.

1.2 Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi § 14, imm. 1 innersuussutigaa, tassuunalu aalajangersarneqarpoq naammagittaalliuut misissuinermik aallartitsinermut pissutigissallugu naammannersoq Ombudsmandip aalajangissagaa.

Oqaaseqaatiga imatut tulleriinnilerneqarpoq:

- Immikkoortoq 2. Suliaq pillugu naatsumik oqaatigisassat
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommuniq isumaa
- Immikkoortoq 5. Uanga naliliinera
- Immikkoortoq 6. Malitseqartitsineq

Oqaatigaara suliap ingerlasimanerata allaaserineqarnera oqaaseqaammut tulliummat.

2. Suliaq pillugu naatsumik oqaatigisassat

A siusinaartumik pensionisiaqalerumalluni Qeqqata Kommunianut 19. april 2016-imi qinnuteqaateqarpoq.

Nakorsap uppersaasiussaa A-p siusinaartumik pensionisiaqalerumalluni qinnuteqaataanik suliarinninnermi atugassaq 23. maj 2016-imi suliarineqarpoq. Kommuniq qinnuteqaat nakorsallu uppersaasiussaa ingerlateqqillugit Majoriamut suliarisassanngorlugit nassiussimanngilai.

Suliaq tamatuma kingornatigut suliamik suliarinninnermi iliuuseqarfigineqarani qaammatini 27-ni uninngasimavoq.

Sulisinnaassuseqarneq pillugu takussutissiaq 20. august 2018-imi suliarineqarpoq, nakorsallu uppernarsaasiussaa nutaaq 8. oktober 2018-imi suliarineqarluni.

Suliaq tamatuma kingornatigut suliamik suliarinninnermi iliuuseqarfigineqarani qaammatit qulit missaanni uninngaqqissimavoq.

A siusinaartumik pensionisiaqalerumalluni 19. august 2019-imi qinnuteqaateqaqqippoq, Majoriallu iliuusissanut pilersaarut 10. september 2019-imi suliaraa.

Majoriap kommunimi ilaqutariinnut immikkoortortaqaarfimmut oqaaseqaataanit 8. juni 2020-meersumit erserpoq siusinaartumik pensionisiaqalerumalluni qinnuteqaat tunuartinneqarsimasoq. Oqaaseqaammi tassani A-p ukioqqortusisimanera nakorsallu uppernarsaasiussaa 2016-imeersoq innersuussutigineqarput.

Taamaakkaluartuq suliap ingerlasimanerata allaaserineqarnera 23. juli 2020-mi suliarineqarpoq, 1. september 2020 aallarnerfigalugu siusinaartumik pensionisiaqalersitsisoqarnissaata akuerineqarnissaa inassuteqaatigalugu, taannalu Pensioninut Ataatsimiititaliami 2020-mi suliarineqartussaasimagaluarpoq. Kommunilli siusinaartumik pensionisiaqalerumalluni qinnuteqaat inaarlugu suliarinngiinnarpaa, Utoqqarnummi Immikkoortortaqaarfik naliliimmat A-p qinnuteqaataata suliarineqarnera iluaqutaanaviangitsoq, pineqartup utoqqalinersiaqarnermut ikaarsaangajalerneru innersuussutigalugu. Tamanna kommunimi Atugarissaarnermut Immikkoortortaqaarfiup A-mut allakkatigut 18. november 2020-meersutigut nalunaarutigaa.

A uannut 5. januar 2021-mi naammagittaalliorpoq, kommunillu suliaq tamatuma kingornatigut suliareqqilerpaa. A-p siusinaartumik pensionisiaqalersinneqarnissaa Pensioninut Ataatsimiititaliap 2. marts 2021-mi inassuteqaatigaa.

Suliaq tamatuma kingornatigut suliamik suliarinninnermi iliuuseqarfigineqarani qaammatini arfineq marlunni uninngaqqissimavoq.

Kommunip A 1. september 2020-mit atuutilersumik 1. oktober 2021-mi siusinaartumik pensionisiaqalersippaa.

3. Inatsiseqartitsinikkut tunngavigisaq

3.1. Piffissaq suliamik suliarinninnermut atorneqartartoq pillugu malittarisassat

Kommuni siusinaartumik pensionisiat pillugit qanoq pilertortigisumik aalajangiissassanersoq siusinaartumik pensionisiat pillugit Inatsisartut inatsisaanni nr. 40-mi, 9. december 2015-imeersumi kingusinnerusukkut allannguuteqartinneqartarimasumi malittarisassanik aalajangersaasoqarsimanngilaq.

Pisortani oqartussaasup sulianik suliarinninnermini piffissaq qanoq sivilutigisoq atortassaneraa ataatsimut aamma aalajangersagaqanngilaq. Ingerlatsinermili ileqqorissaarnerup suliata sapinngisamik pilertornerpaamik illersorneqarsinnaasumillu suliarineqartariaqarnerat nassataraa.

Tamanna Kalaallit Nunaanni Namminersornerullutik Oqartussat Inatsisileriffiata "Suliassat suliarineqartarnerat pillugu ilitersuut"-aanni 1994-imi decemberimi saqqummersinneqartumi ilaatigut imm. 199-imi 204-milu imaattunik oqaasertaqartuni allaaserineqarpoq:

"**199.** Suliassat tamarmik pisortat ingerlatsiviinit suliarineqartut soorunami sapinngisamik pisariitsumik, sukkasuumik aningaasartuutaavallaanngitsumillu suliarineqartar-nissaannik piumasaqaat pingaartumik atuuppoq suliassanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni.

[...]

204. Suliassat suliarineqartarnerat pillugu inatsit suliassat qanoq sivilutigisumik suliarineqartarnissaat pillugu nalinginnaasunik aalajangersagartaqanngilaq. Tamatumunga ilaatigut tunuliaqutaavoq suliassat pisortat ingerlatsiviinit suliarineqartut assigiinneqimmata assigiinngitsunillu annertussuseqartarlutik, taamaattumik inatsisikkut pisortat ingerlatsiviini qanoq sivilutigisumik suliarineqartarnissaasa aalajangersimasu-

nik maleruagassiornissaat ajornarluinnartussaalluni, tassa eqqartuussivinni ajornar-pallaanngitsumik atortinniarneqarsinnaasunik.

Kisiannili Folketingip Ombudsmandiata oqaaseqaatigisartagai tunngavigalugit nalinginnaasumik ingerlatsinermi ileqqut kusanartut malinniarneqarnissaanni suliassat qanoq sivilutigitsumik suliarineqartarnissaat pillugu tunngavigineqarsinnaasunik suliassat suliarineqartarnissaasa aqqissugaasarnissaat pillugu maleruagassaqartitsisoqarpoq, matumani ataani suliamut tunngassuteqartup suliap qanoq sivilutigitsumik suliarineqassangatinneqarneranik ilisimatinneqartarnissaa ilanngullugu eqqarsaatigalugu.

Ombudsmandip aammattaaq aalajangikkat ilaanni tikkuavigisarsimavaa suliat sivilutigitsumik aalajangiivigineqaratik uninngatinneqartarnissaat pinaveersaartinniarlugu kiisalu puigortoorneqarlutik aalajangiivigineqanngitsoortarnissaat pinaveersaartinniarlugu oqartussaasut *naammattumik atorsinnaalluurtunik suliat uterfigineqartarnissaanut allattuiffiliortarnissaat.*"

Tassa suliat sapinngisamik pilertornerpaamik illersorneqarsinnaasumillu suliarineqartarnissaannik oqarnermi sunarpiaq pineqarnersoq suliamit suliamut aalajangiarniarneqartariaqarpoq.

Suliaq pisariaqarneratut pilertortigitsumik suliarineqarsimanersaq apeqqummi ilaatigut suliap suussusia, oqartussaasup suliani taamaattuni piffissaq suliamik suliarinninnerminut nalinginnaasumik atortagaa, suliap pisariussusia, suliami ingerlaavartumik iliuuserineqartut kiisalu suliaq paasissutissartalersorniarlugu suliamik suliarinninnermi iliuutsit piffissaajarnartut iliuuserineqassanersut ilaatigut aalajangiisuusarput.

Suliani arlalinni piffissaq oqartussaasup suliamik suliarinninnerminut atugaa pillugu oqaaseqaateqartarpunga. Suliaq 2011-mi ukiumoortumik nalunaarutinni imm. 5.7.1-imi ilanngunneqartoq aamma 2005-imi ukiumoortumik nalunaarutima qallunaatuani quppernerni 51-imi tulliinilu kalaallisuuani quppernerni 61-imi tulliinilu ilanngunneqartoq ilaatigut innersuussutigaakka. Suliaq taaneqartoq kingulleq Ombudsmandeqarfimmi periaatsimut pisoqaanerungaatsiartumut innersuussutinik imaqarpoq. Suliat 2018-3, 2019-2 aamma 2020-1 nittartakkanni tamanut saqqummiunneqarsimasut aammattaaq innersuussutigaakka.

Uanga paasinninnera unaavoq suliassaqarfimmi tassani inatsisiseqartitsinikkut tunngavigisaq Kalaallit Nunaanni Danmarkimilu pingaarnerusutigut assigiittoq. Taamaattumik Danmarkimi inatsisilerineq pillugu atuakkiaasimasut aamma inner-suussutigaakka, matumani Niels Fengerip allallu atuakkiaanni "Forvaltningsret"-imi (2018-imeersumi) quppernerit 688 tulliiilu, Sten Bønsingip atuakkiaani "Almindelig Forvaltningsret"-imi sisamassaanik (2018-imi) naqitertinneqartumi quppernerit 247 tullialu aamma Jon Andersenip atuakkiaani "Forvaltningsret – Sagsbehandling, Hjemmel, Prøvelse"-mi qulingiluassaanik (2017-imi) naqitertinneqartumi qupperneq 271 ilanngullugit eqqarsaatigalugit.

3.2. Taarsiissuteqarnissamut akisussaaffik

Siusinaartumik pensionisiat pillugit inatsit pillugu ilitsersuut naggasiutitut inner-suussutigaara, taannalu Isumaginninnermut, Suliffeqarnermut Nunamullu Namminermut Tunngasunut Naalakkersuisoqarfiup ataani Naalakkersuisut nittarta-gaanni www.naalakkersuisut.gl-imi atuarneqarsinnaavoq.

Tassanga erserpoq piffissamik suliap suliarineqarneranut atorneqartartumik naammaginantumik nalinginnaasumillu sivisussuseqartumik qaangeerujussuar-nerup kommunalbestyrelsi inatsiseqartitsineq unioqqutillugu iliuseqarsimaner-soq taarsiissuteqarnissamullu akisussaatinneqarsinnaanersoq pissutsit qanoq is-susiat aalajangiisuutillugu apeqqutinngortissinnaagaa.

4. Qeqqata Kommuniata oqaaseqaatai

A-p siusinaartumik pensionisiaqalerumalluni 19. april 2016-imi qinnuteqaateqar-neranit 10. februar 2021-mi oqaaseqaateqarnerup tungaanut suliap ingerlasima-nera Qeqqata Kommuniata uannut oqaaseqaammi 10. februar 2021-meersumi nassuiarpaa.

Kommuni oqaaseqaammini siusinaartumik pensionisiaqalerumalluni qinnuteqaat 19. april 2016-imeersoq nakorsallu uppernarsaasiussaa Atugarissaarnermut Im-mikkoortortaqarfimmit 27. maj 2016-imi tiguneqartut pillugit imatut allappoq:

“Qinnuteqaat atsiorneqarsimasoq kiisalu nakorsap uppersaasiussaa ingerlateqqillugit Majoriamut suliarisassanngortillugit nassiunneqarsimanngitsut takuneqarsinnaavoq.” (Ombudsmandeqarfimmi nutsigaavoq)

Oqaaseqaammit aamma makku erserput:

“Suliamik misissuataarinermi erseqqissumik takuneqarsinnaavoq suliamik suliarinninnermi kukkussuteqartoqarsimasoq, tassami [A-p] siusinaartumik pensionisiaqalerumalluni qinnuteqaataa suliarineqarsimanngimmat aalajangiivigineqarsimananilu. Suliaq ingerlasimanera pillugu akissutitut allakkat 18.11.2020-mi ullulernerqarsimasut aqutsisoqarfiup [A-mut] nassiussimavai, oqaatigisimallugulu siusinaartumik pensionisiaqalerumalluni qinnuteqaat ingerlaqqittariaqanngitsoq, taamaattorli aqutsisoqarfik Qeqqata Kommuniata pisinnaatitaaneq pillugu aalajangersagai atuuttut tunngavigilugit siusinaartumik pensionisiaqalerumalluni qinnuteqaatinik aalajangiiviginninnissaminut pisinnaatitaanngilaq.

Atugarissaanermut Suliassaqarfiup aammattaaq paasissutissiissutigissavaa [A-p] siusinaartumik pensionisiaqalerumalluni qinnuteqaataa Atugarissaanermut Suliassaqarfiup suliareqqilissagaa, Pensionisianut Ataatsimiititalimi tamatumalu kingornatigut Atugarissaanermut Ataatsimiititaliamit inatsit atuuttoq tunngavigalugu aalajangiivigitillugu. Nakorsap paasissutissiissutai, Majoriap allagaatai allat kiisalu pissutsit [A-p] inooqataanikkut atugai pillugit paasissutissat qinnuteqaat aqutsisoqarfiup Atugarissaanermut Ataatsimiititaliamut inassuteqaatigippagu naliliinermi tunngavissatut ilaassapput.

[A-p] siusinaartumik pensionisiaqalersinneqarsinnaassaguni piumasaqaatit qularnaatsumik eqqortippai, tamannalu Atugarissaanermut Ataatsimiititaliamut 2021-mi martsimi itisilernerqassaaq nassuiarneqassallunilu.

[A] sisamanngornermi 11. februar 2021-mi nal. 14:00 oqaloqatigineqarnissaminut aggeqquneqassaaq, tassanilu nassuiaanneqassalluni suliaq suliareqqinneqalersoq, ataatsimiititalianut marlunnut taakkununga suliarisassanngorlugu ingerlatinneqarnissaa siunertaralugu.” (Ombudsmandeqarfimmi nutsigaavoq)

Atugarissaarnermut Immikkoortorta qarfiup pisortaata sulisumalu ilaata 17. november 2021-mi ataatsimiinnerat pillugu allakkiami oqaaseqaat imaattoq ilaavoq:

“[B-p] oqaatigaa periaaseq suliap [A-mut] tunngasup kingornatigut annertuumik allanngortinneqarsimasoq, nassuerutigalugulu immikkoortorta qarfimmi suliamik sularinninnera isorisarialerujussuusimasoq.”

5. Uanga naliliinera

5.a. Uanga piffissamik suliap sularineqarneranut atorneqartumik naliliinera

A siusinaartumik pensionisiaqalerumalluni 19. april 2016-imi qinnuteqarpoq. Kommuni 1. oktober 2021-mi aalajangiivoq A 1. september 2021-mit atuutilersumik siusinaartumik pensionisiaqalersinneqassasoq. Taamaalilluni piffissaq suliamik sularinninnermut atorneqartoq tamarmiusoq ukiut tallimat sinnerlugit siviussuseqarpoq.

Uanga paasinninnera unaavoq suliaq pisariikannersoq Qeqqata Kommuniata pilertornerujussuarmik sularisimasariaqaraluagaa pineqartoq. Taamalilluni uanga naliliinera unaavoq piffissaq suliamik sularinninnermut atorneqartoq pisariaqanngitsumik sivisuallaarsimasoq.

Tamatamani nakorsap uppersaasiussaata 27. maj 2016-imi tiguneqarneranit sulisinnaassuseqarnermik takussutissiap 20. august 2018-imi sularineqarnerata tungaanut kommunip qaammatini 27-ni suliamik sularinninnermi iliuuseqarsimannginnera, suliaku nakorsap nutaamik 8. oktober 2018-imi uppersaasiinneranit A-p siusinaartumik pensionisiaqalerumalluni 19. august 2019-imi qinnuteqaateqaqqinnerata tungaanut qaammatit qulit missaanni uninngateqqinneqarsimanera kiisalu suliap pensionit pillugit ataatsimiititaliap suliamik 2. marts 2021-mi sularinninneranit Atugarissaarnermut Ataatsimiititaliap siulittaasuata suliami 1. oktober 2021-mi aalajangiinnerata tungaanut qaammatini arfineq marlunni su-

liamik suliarinninnermi iliuuseqartoqarsimanginnera pingaartillugit isiginiarpakka.

Piffissaq kommunip suliamik suliarinninnerminut atugaa tamanna tunngavigalugu akuerineqarsinnaanngitsutut isigaara.

5b. Uanga suliamik suliarinninnermik naliliinera

Majoriap kommunimi Ilaqutariinnut Immikkoortortaqarfimmut oqaaseqaataanit 8. juni 2020-meersumit erserpoq siusinaartumik pensionisiaqalerumalluni qinnuteqaat tunuartinneqarsimasoq. Oqaaseqaammi tassani A-p ukioqqortusisimanagera nakorsallu uppernarsaasiussaa 2016-imeersoq innersuussutigineqarput.

Taamaakkaluartoq suliap ingerlasimanerata allaaserineqarnera kommunip 23. juli 2020-mi suliaraa, A 1. september 2020-mit siusinaartumik pensionisiaqalersinneqassasoq Pensioninut Ataatsimiititaliamut inassuteqaatigalugu.

Inassuteqaalli Pensioninut Ataatsimiititaliamit Atugarissaarnermullu Ataatsimiititaliamit suliarineqanngilaq, Utoqqarnummi Immikkoortortaqarfimmi naliliisoqaromat A-p siusinaartumik pensionisiaqalerumalluni qinnuteqaataata suliarineqarnera iluaqutaanaviangitsoq, ullummi 22-t qaangiunneranni utoqqalinersiaqarnermut ikaarsaartussaammat. Kommunip A allakkanik 18. november 2020-mi nassippaa, siusinaartumik pensionisiaqalerumalluni qinnuteqaataa 19. april 2016-imeersoq innersuussutigalugu. Aqutsisoqarfiup allakkani taakkunani oqaatigaa suliaq A-mut tunngasoq suliarineqarniangitsoq, ullunimi 22-ni siusinaartumik pensionisiaqareerluni utoqqalinersiaqarnermut ikaarsaartussaammat. Allakkat taakku nassiunneqarput, naak aqutsisoqarfik taamaaliornissaminut kommunip iluani tunaartarisassat tunngavigalugit pisinnaatitaanngikkaluartoq.

A-p siusinaartumik pensionisiaqalerumalluni qinnuteqaataanik kommunip inarsaalluni suliarinnissimanginnera, inarsaallunilu suliarinninnissaraluamut taarsiullugu allakkanik suliap siusinaartumik pensionisiaqalerumalluni qinnuteqaammut tunngasup A-p ulluni 22-innarni siusinaartumik pensionisiaqareerluni utoq-

qalinersiaqarnermut ikaarsaartussaamera pissutigalugu suliarineqannginnissaa-
nik nalunaaruteqarfiusunik A-mut nassiussisimamera isorisarialittut isigaara.

Tassani kommunip aqutsisoqarfiata piginnaatitaanini pisinnaatitaanilu avaqqul-
lugit iliuuseqarsimamera ajuusaarnartutut aamma isigaara, A-mmi siusinaartumik
pensionsiaqalerumalluni qinnuteqaataa Atugarissaarnermut Ataatsimiititaliamut
saqqummiunneqanngitsoormat.

Ataatsimut isiginnillunga isumaqarpunga kommunip piffissaq suliarinninnerminut
atugaa suliamillu suliarinninnera akuerineqarsinnaanngitsut.

6. Malitseqartitsineq

Maluginiarpara kommunip suliarinninnera isorisariaqarluinnartuusimasoq kom-
munip atugarissaarnermut immikkoortortaqarfiani pisortap sulisuma ilaannik 17.
november 2021-mi ataatsimeeqateqarnermini oqaatigigaa. Atugarissaarnermut
Immikkoortortaqarfiup pisortaata ataatsimiinnermi oqaatigaa kommunimi siusi-
naartumik pensionisiaqalerumalluni qinnuteqaatinik suliarinnittarnermi periaaseq
annertuutigut allannguuteqartitsiviusimasoq.

Kommuni qinnuigaara kommunimi sulianik suliarinnittarnermi periaatsip anner-
tuutigut allannguuteqartinneqarsimanagerani suut pineqarnermut uannut nalunaa-
rutigeqqullugu.

Kommuni aammattaaq qinnuigaara kommuni eqqaasitseriaatsinik sunniuteqar-
luartunik suliat siunissami puigorneqartannginnissaannik qulakkeerisunik peqar-
nersoq uannut paasissutissiissutigeqqullugu.

Kiisalu kommuni qinnuigaara oqaaseqaatiga, matumani immikkoortoq 3.2 taar-
siissuteqartoqarsinnaaneranut tunngasoq ilanngullugu eqqarsaatigalugu, qanoq
iliuuseqarnissamut pissutissaqalersitsinersoq uannut nalunaarutigeqqullugu.

Qeqqata Kommuniani kommunalbestyrelsi aamma Inatsisartut Inatsisinut Ataat-
simiititaliaat nalunaarfigaakka. Ombudsmandi pillugu inatsimmi § 23 tunngaviga-

lugu taamaaliorpunga, tassuunalu aalajangersarneqarpoq pisortat ingerlatsiviani annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq Ombudsmandip suliamik misissuinerata takutippagu Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqassasoq.

Allakkat ukua assilinerat A-mut nassiuppara.

Oqaaseqaat manna oqaaseqaammi pineqartup kinaassusia ilisarnarunnaarsillugu nittartakkakkut tamanut saqqummiunneqarumaarpoq 2023-milu ukiumoortumik nalunaarutinni eqqaaneqarumaarluni.

SULIAP INGERLASIMANERA

A siusinaartumik pensionisiaqalerumalluni Qeqqata Kommunianut 19. april 2016-imi qinnuteqaateqarpoq, kommunillu Sisimiuni Peqqissaavik ulloq taanna qinnuigaa nakorsap uppersaasiussaaniq suliap suliarineqarnerata ingerlaqqinnerani atugassamik nassiusseqqullugu.

Nakorsap uppersaasiussaa 23. maj 2016-imeersoq A-p siusinaartumik pensionisiaqalerumalluni qinnuteqaataaniq suliarinninnermi atugassaq kommunip 27. maj 2016-imi tiguaa. Qinnuteqaat nakorsallu uppersaasiussaa Atugarissaarnermut Immikkoortortaqaarfimmit Majoriamut suliarisassanngortillugu ingerlateqqillugu nassiunneqarsimanngilaq.

A kommunimi suliamik suliarinnittumik 20. august 2018-imi oqaloqateqarpoq. Tassani oqaatigaa siusinaartumik pensionisiaqalerumalluni 2016-imi qinnuteqaateqarsimalluni. Sulisinnaassuseqarnermut takussutissiaq suliami atugassaq suliamik suliarinnittup A peqatigalugu tamatuma kingornatigut immersorpaa, nakorsallu uppersaasiussaa nutaaq suliap suliarineqarnerata ingerlaqqinnerani atugassaq nassiateqqullugu kommunip Sisimiuni Peqqissaavik ulloq taanna qinnuigaa.

A nakorsamit 26. september 2018-imi misissorneqarpoq, nakorsallu uppersaasiussaa nutaaq suliami siusinaartumik pensionisianut tunngasumi atugassaq 8. oktober 2018-imi suliarineqarluni.

A siusinaartumik pensionisiaqalerumalluni 19. august 2019-imi qinnuteqaateqaqqippoq, qinnuteqaallu Majoriamut ingerlateqqillugu nassiunneqarluni.

Iliusissanut pilersaarut Majoriap 10. september 2019-imi suliaraa.

Suliami allattukkamit 11. maj 2020-meersumit erserpoq A "ingerlariaqqinnissamut aqutissiuussineq kajumissaarinerlu" (VM) pillugit ataatsimiinnermi peqataasimasooq, kiisalu A ingerlariaqqinnissamut aqutissiuussinermi kajumissaarinnermilu peqataasassanngitsoq, ukioqqortusisimanini pissutigalugu.

Kommunip Ilaqutariinnut Immikkoortortaarfianut oqaaseqaat Majoriap 8. juni 2020-mi suliaraa. Tassani ilaatigut makku allassimapput:

“A 2019-imi augustimi siusinaartumik soraarnerussutisiaqarniarluni qinnuteqarsimavoq.

Siusinaartumik soraarnerussutisiaqalerniarluni qinnuteqarneranut atatillugu Suliffisarsiuussisarfimmut suliaq ingerlateqqinneqarnikuuvoq, qinnuteqartup sulisinnaassusaatigut qulaajaaffigineqarnissaa tunaartaralugu. Iliuusissanullu pilersaarusoqatigineqarnerani ulloq aallartiffik septemperi 2019-imi.

Isumaqatigiissutigineqarpoq ingerlariaqqinnissamut aqutissiuussinermi kajumissaarnermilu peqataassasoq majip 18-ianni 2020.

Pineqartuq aggersarneqarnermi kingorna aggerpoq, kisianni ukioqqortunera pissutaalluni VM-imut peqataanngiinnarpoq, tamanna oqaasiinnakkut førtidspension sagsbehandlerinut paasitinneqaratta.

Tamanna tunngavigalugu siusinaartumik soraarnerussutisiaqalerniarluni qinnuteqaataa utertinneqarpoq. Nakorsallu oqaaseqaataa 2016-imeersoq innersuussutigalugu maanna suliaq utertinneqarpoq.”

Qeqqata Kommuniata uannut oqaaseqaammuni 10. februar 2021-meersumi oqaatigaa suliap ingerlasimanerata allaaserineqarnera 23. juli 2020-mi suliarineqarsimasoq, Pensioninut Ataatsimiititaliap suliamik 2020-mi augustimi suliarinninnerani atugassatut. Suliap ingerlasimanerata allaaserineqarnera siusinaartumik pensionisiaqalersitsinerup 1. september 2020-mit atuutilersumik akuerineqarnissaata inassuteqaatigineqarneranik imaqarpoq. Utoqqarnullu Immikkoortortaarfimmi naliliisoqarpoq A-p qinnuteqataanik suliarinninneq iluaqutaanavianngitsoq, A-mmi utoqqalinersiaqalersinnaassagaanni ukiussat ullut 22-t qaangiunneranni angusimasussaammagit.

Qeqqata Kommuniata allakkat imaattut A-mut 18. november 2020-mi nassiupai:

“Siusinaartumik pensioneqalernissamik qinnuteqaatinnut akissut

Siusinaartumik pensionisiaqalernissamik qinnuteqarsimavutit ulloq 19-04-2016, nakorsamiit oqaaseqaat tiguneqarpoq ulloq 27-05-2016. Ressourceprofil suliarineqarsimannngilaq aammalu suliffisarsiuussisarfimmut ingerlateqqinneqarsimannngilaq. Ulloq

20-08-2018 nakorsap oqaaseqaataanik nutaamik aallertoqarpoq aamma Ressource-profil suliarineqarluni.

Ulloq 19-08-2019 siusinaartumik pensioneqalernissamut qinnuteqaateqarteqqinneqarpoq ulloq taanna nassiunneqarlutik Majoriamut. Majoriamiit suliaq utertissimangilaat. Ulloq 11-06-2020 Majoriamut paasiniaasoqarpoq suliaq sumut killinnersoq (suliffimmik misiliitinneqarsimangersoq).

Ulloq 23-07-2020 sagsfremstilling suliarineqarpoq. Pensionsudvalgimut ingerlateqqinneqartussaannersoq paasiniaasoqaralarpoq, kisiannili oqariartuuteqartoqarsimavoq ullut 22-t siusinaartumik pensionisiaqariarluni utoqqalinersiaqalertussaammat ingerlaqqittariaqanngitsoq.

Styrelsen for Råd og Nævn
Det Sociale Ankenævn
Postboks 689
3900 Nuuk"

Kommunip siusinaartumik pensionisiaqalerumalluni qinnuteqaammik suliarinninera A-p uannut 5. januar 2021-mi naammagittaalliuutigaa.

Qeqqata Kommunian 8. januar 2021-mi qinnuigaara suliami allagaatit tamaasa kiisalu suliaq pillugu oqaaseqaat uannut nassiteqqullugit.

Suliami allagaatit arlallit kommunimit e-mailikkut 13. januar 2021-meersukkut tiguakka.

Sulisuma ilaata Qeqqata Kommunian suliami allagaatinik tamanik kiisalu suliaq pillugu oqaaseqaammik nassiusseqqullugu oqarasuaatikkut 9. februar 2021-mi nukingisaarpaa.

Suliami allagaatit arlallit oqaaseqaallu Qeqqata Kommunianit e-mailikkut 10. februar 2021-meersukkut tiguakka. Kommuni uannut oqaaseqaammi tassani imatut allappoq:

“Atugarissaarnermut Immikkoortorta qarfiup suliame allagaatit [A-p] naammagittaalliutaanut tunngasut Inatsisartut Ombudsmandiata allakkatigut 8. januar 2021-meersutigut qinnuiginninnera tunngavigalugu matumuuna nassiuppai.

Oqaatigineqarsinnaavoq [A] siusinaartumik pensionisiaqalerumalluni siullermik 19.-04.2016-imi ulluleneqarsimasumik qinnuteqaateqarsimammat, nakorsallu uppernaarsaassua pissariariniarneqarsimammat Atugarissaarnermut Immikkoortorta qarfiup 27.05.2016-imi tigusimagaa. Takuneqarsinnaavoq qinnuteqaat atsiorneqarsimasoq Majoriamut suliareqqitassanngorlugu ingerlateqqillugu nassiunneqarsimanngitsoq.

Pisortanit ikiorsiissutisiat nutarterneqarnerannut atatillugu pineqartoq suliamek suliarinnittumit 20.08.2018-imi oqaloqatigineqarpoq, tassanilu siusinaartumik pensionisiaqalerumalluni 2016-imi qinnuteqaateqarsimanini oqaatigaa, taamaattumillu sulisinaassuseqarneq pillugu takussutissiaq suliamek suliarinnittoq peqatigalugu immersorneqarsimalluni.

[A] 19.08.2019-imi saaffigineqqippooq, siusinaartumillu pensionisiaqalerumalluni qinnuteqaat nutaaq atsiorlugu, taannalu piginnaanngorsaaqqinnermik pilersaarummut atatillugu Majoriamut ingerlateqqullugu nassiunneqarluni. Majoriap oqaaseqaat 08.-06.2020 ulluleneqarsimasoq nassiuppaa, tassanilu allaaserineqarluni ingerlariaqqinnissamut pilersaarut pineqartumut neqeroorutigineqarsimagaluartoq, ukioqqortusisimanerali pissutigalugu ingerlanneqarsinnaasimanani.

Majoriap oqaaseqaataa 2020-mi junimi Atugarissaarnermut Immikkoortorta qarfiimmit tiguneqarmat ikiorsiisarnermi sulianik suliarinnittup suliap ingerlasimanera pillugu allaaserisaq suliaraa, taamaalilluni qinnuteqaat Atugarissaarnermut Ataatsimiititaliamit suliarineqarsinnaaqqullugu. Qinnuteqaat 2020-mi augustimi Pensioninut Ataatsimiititaliamiittussaasimagaluarpoq, 01-09.2020-mit akuerineqarnissaa inassuteqaatigalugu, Utoqqarnullu Immikkoortorta qarfik naliliilluni siusinaartumik pensionisiaqalerumalluni qinnuteqaataata suliarineqarnissaa iluaqutaanaviannngitsoq, tassami ullut 22-t qaangiuppata utoqqalinersiaqarnermut ikaarsaartussaammat.

“Aalajangiisartunik Siunnersuisoqatigiinnillu Aqutsisoqarfik” eqqarsaatigalugu Ikiorsiisarfiimmi immikkoortorta qarfiup pisortaata nassuiaalluni oqaatigaa allakkanik ilusileeriaaseq pisoqaaq suliamek suliarinnittup atorsimagaa, taamalu kukkunini maluginngitsoorsimallugu.

Ilanngussat uku kakkiunneqarput:

- Siusinaartumik pensionisiaqalerumalluni qinnuteqaat 19.08.2019-mi ullulernerqarsimasoq
- Nakorsap uppersaasiussai 27.05.2016-imi aamma 08.10.2018-imi ullulernerqarsimasut
- Sulisinnaassuseqarnermut takussutissiaq 20.08.2018-imi ullulernerqarsimasoq
- Piginnaangorsaaqqinnermut atatillugu isumaginnikkut nalunaarusiaq 19.08.-2019-imi atsiorneqarsimasoq
- Majoriap oqaaseqaataa 08.06.2020-mi ullulernerqarsimasoq
- Suliami allattuiffik Majoriameersoq 22.05.2020-meersoq
- Nalunaarsuinermi paasissutissat Majoriameersut
- Iliusissanut pilersaarut Majoriameersoq 10.09.2019-imi ullulernerqarsimasoq
- Iliusissanut pilersaarummut atatillugu qulaajaaniarluni ataatsimiigiaqqusissut 09.-09.2019-imi ullulernerqarsimasoq
- Ilitsersuilluni soqutiginnilersitsiniarlunilu pikkorissaanermi peqataaniarluni nalunaarneq 04.05.2020 ullulernerqarsimasoq
- Majoriap allagai 08.06.2020-mi ullulernerqarsimasut
- Atugarissaarnermut Immikkoortortaqrifiup allagai 18.11.2020-meersut
- Atugarissaanermut Immikkoortortaqrifiup suliami allattuiffimmi allattugai.

Suliamik misissuataarinermi erseqqissumik takuneqarsinnaavoq suliamik suliarinninnermi kukkussuteqartoqarsimasoq, tassami [A-p] siusinaartumik pensionisiaqalerumalluni qinnuteqaataa suliarineqarsimanngimmat aalajangiivigineqarsimananilu. Suliap ingerlasimanera pillugu akissutitut allakkat 18.11.2020-mi ullulernerqarsimasut aqutsisoqarfiup [A-mut] nassiussimavai, oqaatigisimallugulu siusinaartumik pensionisiaqalerumalluni qinnuteqaat ingerlaqqittariaqanngitsoq, taamaattorli aqutsisoqarfik Qeqqata Kommuniata pisinnaatitaaneq pillugu aalajangersagai atuuttut tunngavigalugit siusinaartumik pensionisiaqalerumalluni qinnuteqaatinik aalajangiiviginninnissaminut pisinnaatitaanngilaq.

Atugarissaanermut Suliassaqrifiup aammattaaq paasissutissiissutigissavaa [A-p] siusinaartumik pensionisiaqalerumalluni qinnuteqaataa Atugarissaanermut Suliassaqrifiup suliareqqilissagaa, Pensionisianut Ataatsimiititalimi tamatumalu kingornatigut Atugarissaanermut Ataatsimiititaliamit inatsit atuuttoq tunngavigalugu aalajangiivigitillugu. Nakorsap paasissutissiissutai, Majoriap allagaatai allat kiisalu pissutsit [A-p] inooqataanikkut atugai pillugit paasissutissat qinnuteqaat aqutsisoqarfiup Atugaris-

saarnermut Ataatsimiititaliamut inassuteqaatigippagu naliliinermi tunngavissatut ilaassapput.

[A-p] siusinaartumik pensionisiaqalersinneqarsinnaassaguni piumasaqaatit qularnaatsumik eqqortippai, tamannalu Atugarissaarnermut Ataatsimiititaliamut itisilerneqassaaq nassuiarneqassallunilu.

[A] sisamangornermi 11. februar 2021-mi nal. 14:00 oqaloqatigineqarnissaminut aggeqquneqassaaq, tassanilu nassuiaanneqassalluni suliaq suliareqqinneqalersoq, ataatsimiititalianut marlunnut taakkununga aalajangiinissamut pisinnaatitaasunut suliarissanngorlugu ingerlatinneqarnissaa siunertaralugu." (Ombudsmandeqarfimmi nutsigaavoq)

Qeqqata Kommunia 25. februar 2021-mi qinnuigaara allaffiup Atugarissaarnermut Ataatsimiititaliamut inassuteqaataa, Atugarissaarnermut Ataatsimiititaliap ataatsimiinneranit imaqarniliaq, Pensioninut Ataatsimiititaliap ataatsimiinneranit imaqarniliaq aamma suliami A-p siusinaartumik pensionisiaqalerumalluni qinnuteqaataa pillugu aalajangiineq uannut nassuteqqullugit.

Sulisuma ilaata kommuni suliami allagaatinik nassiusseqqullugu oqarasuaatikkut 19. juli 2021-mi nukingisaarpaa.

Sulisuma ilaata kommuni suliami paasissutisseeqqullugu e-mailikkut 30. juli 2021-mi nukingisaaqqippaa.

Sulisuma ilaata kommuni suliami paasissutisseeqqullugu oqarasuaatikkut 2. august 2021-mi nukingisaaqqippaa.

Sulisuma ilaata kommuni suliami allagaatinik nassiusseqqullugu oqarasuaatikkut 24. august 2021-mi nukingisaaqqippaa.

Aqutsisoqarfiup Atugarissaarnermut Ataatsimiititaliamut inassuteqaataa aamma Pensioninut Ataatsimiititaliap 2. marts 2021-mi ataatsimiinnerannit imaqarniliaq e-mailikkut 15. september 2021-meersukkut tiguakka. Inassuteqaammit ilaati-gut makku erserput:

“Atugarissaarnermut Immikkoortorta qarfiup innersuussutigivaa Atugarissaarnermut Ataatsimiititaliamut:

1. [A-p] siusinaartumik pensionisiaqalernissaa ulloq 01.09.2020 atuutilersussamik akuersissutigineqassasoq.
2. Sulisinnaassutsip 25 %-imut nalilerneqarneratigut qaammammut siusinaartumik pensionisiassat 9.083 koruuninik annertussuseqassasut.”

Pensioninut Ataatsimiititaliap suliamik 2. marts 2021-mi suliarinninnera pillugu imaqarniliamit ilaatigut makku erserput:

“Taamaattoq Pensionsudvalgip isumaqatigiittup siusinaartumik pensionisiaqalernissamik qinnuteqaat ilalerpaa. Pisortatigut ikiorsiisarnermi immikkoortorta qarfik inatsisilerituumut paasiniaassaaq, qaqugu aallartinnissaanut inatsisitigut qanoq inissee-riartoqarsinnaanerani.”

Qeqqata Kommunia 21. september 2021-mi qinnuigaara suliap suliarineqarnera sapinngissamik nukingiuteqqullugu, kommunilu qinnuigalugu suliama allagaatit sinnerisa assilineri uannut nassiteqqullugit.

Inatsisartut Inatsisinut Ataatsimiititaliaat 1. oktober 2021-mi nalunaarfigaara suliama matumani Ombudsmanditut suliassara isumagisinnaanngikkiga, tassami suliama allagaatinik Qeqqata Kommunianit suli tigusaqannginnama. Kommunalbestyrelsi suliamik tamatumunnga peqatigitillugu nalunaarfigaara.

A-p siusinaartumik pensionisiaqalerumalluni qinnuteqaataanik Qeqqata Kommuniaata aalajangiiviginninnera tamatuma kingornatigut e-mailikkut 1. oktober 2021-mi tiguara. Aalajangiinermi 1. oktober 2021-meersumit ilaatigut makku erserput:

“Matumuuna nalunaarutigineqassaaq siusinnerusukkut siusinaartumik pensionisiaqalernissannik qinnuteqaat suli aalajangiiffigineqarsimanngitsoq. Suliap qaqeqqinneratigut siusinaartumik pensionisiaqalernissamik qinnuteqaat Atugarissaarnermut Ataatsimiititaliap siulittaasuata ulloq 1. oktober 2021 akuersissutigimmagu.

Atugarissaarnermut Ataatsimiititaliap siulittaasuata akuersissutigivaa piffissaq september 2020 siusinaartumik pensionisiaqalernissat, taamaattumik Atugarissaarnermut Immikkoortorta qarfirmut sulisinnaassutsikkut piginnaasatit 25 % ataallugit appariaa-teqarsimasutut naliliineq tunngavigalugu aaqiissutissaq qaamat september 2020 aningaasartai kr. 9.083 skatti peereernagu tunniunneqartussanngortut.

Qinnuteqaatip suliarinerani tunngavigineqarpoq siusinnaartumik pensionisiat pillugit Inatsisartut inatsisaat nr. 40. decemberip 9-ani 2015-imeersoq § 9 imm. 2 aammalu § 17 imm. 2+3, § 31, § 43, imarisai quppernerup tulliani takuneqarsinnaapput.

Aaqiissutissat siusinaartumik pensionit suliarinissat kommunip utoqqarnut sullissivianit suliarineqassapput, tamannalu pillugu sullissisuit attavigissavaatit.

Qulaani aalajangerneq naammaginngikkukku isumaginninnikkut aalajangikkat pillugit naammagittaalliortarfimmu maalaarutigisinnaavat, tamannalu pisinnaavoq ulloq aalajangiiffimmit sapaatit akunneri arfinillit qaangiutsinnagut uunga:

Isumaginninnikkut Aalajangikkat pillugit Naammagittaalliortarfik
Postboks 689
3900 Nuuk"

Sulisuma ilaata Sisimiunut angalanermut atatillugu Qeqqata Kommuniani Atugarissaarnermut Immikkoortorta qarfiup pisortaa suliaq A-mut tunngasoq pillugu 17. november 2021-mi ataatsimeeqatigaa. Sulisuma ilaata ataatsimiinneq taanna pillugu imaqarniliaq tamatuma kingornatigut suliaraa. Tassannga ilaatigut makku erserput:

"[B-p] oqaatigaa periaaseq suliap [A-mut] tunngasup kingornatigut annertuumik allanngortinneqarsimasoq, nassuerutigalugulu immikkoortorta qarfirmi suliamik suliarininnera isorisarialerujussuusimasoq."